



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

STATISTIK GUNA TENAGA, MALAYSIA SUKU TAHUN KEDUA 2025

Permintaan buruh Malaysia kekal menggalakkan pada ST2 2025 dengan 9.10 juta jawatan, meningkat sebanyak 1.6 peratus tahun ke tahun.

PUTRAJAYA, 14 OGOS 2025 – Permintaan buruh Malaysia kekal menggalakkan pada ST2 2025 dengan 9.10 juta jawatan, meningkat sebanyak 1.6 peratus tahun ke tahun, Jabatan Perangkaan Malaysia (DOSM) melaporkan dalam penerbitan **Statistik Guna Tenaga, Suku Tahun Kedua 2025** pada hari ini. Statistik yang diterbitkan dalam laporan adalah berdasarkan Survei Guna Tenaga yang dilaksanakan ke atas syarikat perniagaan sektor swasta yang berdaftar. Laporan ini membentangkan statistik permintaan buruh merangkumi indikator bilangan jawatan, jawatan diisi, kekosongan jawatan dan pewujudan jawatan mengikut kategori kemahiran dan aktiviti ekonomi.

Di sebalik ketidaktentuan dan cabaran global, Ketua Perangkawan Malaysia, Dato' Sri Dr. Mohd Uzir Mahidin berkata, "Sektor ekonomi Malaysia kekal stabil pada suku tahun kedua 2025 dengan bilangan jawatan meningkat sebanyak 1.6 peratus tahun ke tahun iaitu pertambahan sebanyak 142.2 ribu jawatan dengan merekodkan 9.10 juta jawatan (ST2 2024: 8.96 juta). Ini sejajar dengan prestasi ekonomi Malaysia yang semakin berkembang, mendorong perniagaan di semua sektor untuk meningkatkan penyertaan tenaga buruh untuk memenuhi permintaan pengeluaran yang semakin meningkat. Daripada jumlah keseluruhan jawatan, 97.9 peratus telah diisi manakala baki 2.1 peratus masih kosong."

Ketua Perangkawan turut menyatakan bahawa bilangan jawatan diisi menunjukkan trajektori peningkatan yang konsisten, meningkat sebanyak 1.6 peratus tahun ke tahun untuk merekodkan 8.90 juta jawatan diisi pada suku tahun ini berbanding 8.76 juta pada ST2 2024. Kestabilan ini digambarkan dengan pertumbuhan positif tahun ke tahun dalam jawatan diisi bagi semua sektor ekonomi, didahului oleh sektor Perkhidmatan yang merekodkan pertumbuhan tertinggi sebanyak 2.1 peratus. Ini diikuti oleh sektor Pembuatan dan Pembinaan masing-masing dengan kadar

1.4 peratus dan 0.6 peratus. Perincian mengikut aktiviti ekonomi, jawatan diisi kekal tertumpu dalam sektor Perkhidmatan yang merangkumi 53.0 peratus atau 4.72 juta jawatan diisi. Ini disusuli oleh sektor Pembuatan dengan 26.8 peratus (2.38 juta) dan Pembinaan pada 14.0 peratus (1.25 juta). Berdasarkan pecahan mengikut kategori kemahiran, kategori separuh mahir mendahului dengan 5.56 juta jawatan diisi atau 62.5 peratus daripada jumlah keseluruhan. Kategori mahir menyusul dengan 2.24 juta jawatan diisi (25.2%) manakala berkemahiran rendah menyumbang peratus sumbangan terendah iaitu 12.3 peratus dengan 1.10 juta jawatan.

Mengulas lanjut mengenai permintaan buruh, Ketua Perangkawan menekankan, “Kekosongan jawatan meningkat sebanyak 1.8 peratus pada ST2 2025, bersamaan dengan pertambahan 3.4 ribu kekosongan dari suku sama tahun lepas, menjadikan jumlah keseluruhan sebanyak 194.9 ribu kekosongan (ST2 2024: 191.5 ribu). Peningkatan ini didorong oleh sektor Pembuatan dengan 112.4 ribu kekosongan (57.7%), terutamanya dalam subsektor Elektrik, elektronik dan produk optikal (34.8 ribu), diikuti oleh Produk petroleum, kimia, getah dan plastik (20.0 ribu). Seterusnya, sektor Pertanian merekodkan 31.8 ribu kekosongan (16.3%), diikuti oleh Pembinaan dengan 25.2 ribu kekosongan (13.0%). Analisis lanjut kekosongan jawatan mengikut kategori kemahiran, kategori separuh mahir merupakan penyumbang terbesar dengan 56.2 peratus (109.5 ribu). Sementara itu, kategori mahir dan berkemahiran rendah masing-masing menyumbang peratusan selebihnya dengan 24.6 peratus (48.0 ribu) dan 19.2 peratus (37.4 ribu).”

Perkembangan permintaan buruh di Malaysia turut disumbangkan oleh pewujudan jawatan baharu dengan 31.9 ribu pewujudan jawatan pada suku ini, meningkat 0.2 peratus tahun ke tahun (ST2 2024: 31.9 ribu). Sebahagian besar jawatan baharu ini diwujudkan melalui usaha yang dipergiatkan untuk memacu pendigitalan dan mengamalkan budaya mampan, individu perlu memperkukuh literasi teknologi agar kekal berdaya saing dalam pasaran buruh berasaskan teknologi. Dari segi aktiviti ekonomi, sektor Perkhidmatan mencatatkan sumbangan yang ketara dengan 14.9 ribu pewujudan jawatan (46.7%), terutamanya dalam subsektor Perdagangan borong dan runcit dengan 8.8 ribu jawatan baharu. Sementara itu, 11.9 ribu (37.4%) jawatan baharu diwujudkan dalam sektor Pembuatan, dengan subsektor Produk elektrik, elektronik dan optikal mencatatkan jumlah tertinggi dengan 4.0 ribu jawatan baharu. Di samping itu, sektor Pembinaan menyumbang 3.5 ribu jawatan baharu (11.0%). Berdasarkan pecahan mengikut kategori kemahiran, kategori separuh mahir kekal sebagai penyumbang tersebar kepada pewujudan jawatan dengan 64.6 peratus (20.6 ribu). Ini diikuti oleh kategori mahir sebanyak 24.9 peratus (7.9 ribu) dan berkemahiran rendah sebanyak 10.5 peratus (3.4 ribu).

Merumuskan kenyataannya, Dato’ Sri Dr Mohd Uzir Mahidin menyatakan bahawa permintaan buruh di Malaysia kekal dinamik dan berdaya tahan pada suku semasa walaupun berdepan cabaran luar, termasuk ketidaktentuan tarif dan ketegangan geopolitik di Timur Tengah. Beliau turut menyatakan bahawa prestasi stabil ini

disokong oleh permintaan domestik yang memberangsangkan dan perbelanjaan pengguna yang stabil yang membantu mengekalkan operasi perniagaan sejajar dengan usaha berterusan mewujudkan pekerjaan. Situasi ini disokong oleh anggaran awal KDNK Malaysia yang mencatatkan peningkatan tahun ke tahun sebanyak 4.5 peratus pada ST2 2025. Walau bagaimanapun, perniagaan telah menunjukkan keupayaan menyesuaikan diri dengan baik dalam menangani cabaran luar, sekali gus mengurangkan kesan situasi semasa. Ini mencerminkan kesiapsiagaan mereka untuk mengekalkan operasi yang seterusnya menyokong momentum positif permintaan buruh di Malaysia.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.


Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.


OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Embargo: Hanya boleh diterbitkan atau disebarikan mulai jam 1200, Khamis, 14 Ogos 2025


**Carta 1: Jawatan, Kadar Jawatan Diisi dan Kadar Kekosongan,
ST2 2022 - ST2 2025**




Carta 2: Pewujudan Jawatan, ST2 2022 - ST2 2025



Paparan 1: Permintaan Buruh mengikut Aktiviti Ekonomi, ST2 2025 (% Sumbangan)



Paparan 2: Permintaan Buruh mengikut Kategori Kemahiran, ST2 2025



Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
14 OGOS 2025